

Pintora local Lislaine Bermudez:

“Den futuro mi lo kier duna mas tayer na mucha”

ORANJESTAD – Lislaine Bermudez ta un pintora local cu Bon Dia Aruba a yega di entrevista varios ocasion. Recientemente el a wordo invita cu mas pintor local pa duna un charla y tayer tocante pintamento na Arco Iris Kleuterschool.

Sra. Bermudez ta conta Bon Dia Aruba cu den futuro el lo kier duna mas tayer na muchanan ya cu esey semper tabata un di su intencionnan. Pero prome cu e haci esey tin cosnan cu e kier tin cla. E ta comenta cu el a haya e experiencia masha agradabel y el a gusta e interaccion cu e muchanan.

Respeto otro

Sra. Bermudez ta bisa cu el a conta e muchanan cu nan mester respecta otro. Tambe e ta bisa cu paso e muchanan ta chikito el lo djis laga nan uza locual nan ta siñando. Pues el a duna e muchanan un papel blanco y laga tur pinta hunto den grupo. “Ya asina nan por siña respecta otro nan decision pasobra e pintura ta di nan tur. Sra. Bermudez ta bisa “E ta siña nan wak cos di otro manera. Pasobra por ta abo a pensa bo kier a traha un bala cu un circle. Pero e otro



mucha kier a traha un tire, pues cosnan asina. Anto nan a haya leuk cu nan por a uza verf. Wanta un brush y pinta

manera un artista.”

Segun sra. Bermudez e muchanan tabata hopi emocionada y e experiencia pa nan tabata algo otro compara cu locual nan ta haci na scol. Asina e muchanan ta wordo motiva pa haci cosnan leuk tambe. Sra. Bermudez ta subraya “Hopi biah muchanan ta wordo husga pasobra por ta nan no ta bon den rekenen. Esey tambe sa demotivante pa un persona. Mientras cu si nan por haci arte y esey te hasta por yuda nan cu otro



vaknan cu nan no ta bon den dje simplemente di nan mesun motivacion. Tambe mi a puntra nan si pinta ta haci nan contento. Nan a bisa nan a sinti hopi contento door di e colorman Anto e ora mi a bisa nan si un dia nan ta sinti malo nan por pinta algo yen di color y esey lo haci nan contento.

Tocante sra. Bermudez

Sra. Bermudez, Manera Bon Dia a publica den ocasionnan anterior, reflexionando riba su aña artistico cu tabata 2014, e a conta cu el a pinta 57 pintura di cual 50 tin doño caba. Sra. Bermudez a conta cu den 2014 e tabata tin hopi inspiracion. E ta conta cu pa motibo cu ora e entrega e pinturanan den un papel di regalo, hende ta actua sorprendi ora nan haya nan paso aunke nan a paga pa esaki e ta manera un regalo pa nan

mes. Practica hopi, a haci tur e diferencia pa sra. Bermudez. Segun e, e ta wak un mehoracion hopi obvio den su trabao desde tempo el a cuminsa pinta 3 aña pasa. E miho experiencia di 2014 pa su persona tabata wordo scogi como un di 5 iconnan di telefon pa hubentud en conexion cu e lansamento di nan app nobo.

Sra. Bermudez a conta cu locual ta inspira su persona masha hopi mes ta tur locual cu ta rond di dje. Manera entro otro naturalesa, color, cantica. Cualquier cos cu gara su atencion. E ta bisa cu e ta un persona cu gusta observa y pensa. Asina su imaginacion por cuminsa draai pa crea un pintura. Tambe tin un persona special den su bida cu ta inspira su persona. E ta considera e persona ey e motibo pa cual e ta haci locual e ta haci awe. □

